

佛說阿彌陀經易解

釋淨宣敬  
題



菩薩戒弟子韓鏌居士講述

佛說阿彌陀經易解

藏  
經  
閣  
PDG

90/5527

## 認識佛教

淨空

◎佛教是佛陀對九法界衆生至善圓滿的教育。

◎釋迦四十九年所說的一切經，內容就是說明宇宙人生的真相。人生就是自己，宇宙就是我們生活的環境。

◎知覺名佛菩薩，不覺名凡夫。

◎修行就是將我們對宇宙人生錯誤的看法、想法、說法、做法，加以修正。

◎佛教的修行綱領是覺正淨。覺而不迷，正而不邪，淨而不染。並依戒定慧三學，以求達到此目標。

◎修學的基礎是三福，待人依六和，處世修六度，遵普賢願，歸心淨土。佛之教化能事畢矣。

# 佛說阿彌陀經

姚秦三藏法師鳩摩羅什譯

如是我聞。一時佛在舍衛國。祇樹給孤獨園。與大比丘僧千二百五十人俱。皆是大阿羅漢。衆所知識。長老舍利弗。摩訶目犍連。摩訶迦葉。摩訶迦旃延。摩訶俱絺羅。離婆多。周利槃陀伽。難陀。阿難陀。羅睺羅。憍梵波提。賓頭盧頗羅墮。迦留陀夷。摩訶劫賓那。薄拘羅。阿菟樓駄。如是等諸大弟子。並諸菩薩摩訶薩。文殊師利法王子。阿逸多菩薩。乾陀訶提菩薩。常精進菩

薩·與如是等諸大菩薩·及釋提桓因等·無量諸天大眾俱。爾時佛告長老舍利弗·從是西方·過十萬億佛土·有世界名曰極樂。其土有佛·號阿彌陀·今現在說法。舍利弗·彼土何故名爲極樂。其國衆生·無有衆苦·但受諸樂·故名極樂。又舍利弗·極樂國土·七重欄楯·七重羅網·七重行樹·皆是四寶周而圍繞·是故彼國名爲極樂。又舍利弗·極樂國土·有七寶池·八功德水·充滿其中。池底純以金沙布地·四邊階道·金·銀·瑠璃·玻瓈合成。上有樓閣·亦以金·銀·瑠璃·玻瓈·

碑磔·赤珠·碼碯·而嚴飾之。池中蓮華·大如車輪·青色青光·黃色黃光·赤色赤光·白色白光·微妙香潔·舍利弗·極樂國土·成就如是功德莊嚴。又舍利弗·彼佛國土·常作天樂·黃金爲地·晝夜六時·雨天曼陀羅華·其土衆生·常以清旦·各以衣祴盛衆妙華·供養他方十萬億佛·即以食時·還到本國·飯食經行·舍利弗·極樂國土·成就如是功德莊嚴·復次舍利弗·彼國常有種種奇妙雜色之鳥·白鶴·孔雀·鸚鵡·舍利·迦陵頻伽·共命之鳥·是諸衆鳥·晝夜六時·出和雅音·

其音演暢五根·五力·七菩提分·八聖道分·如是等法  
。其土衆生·聞是音已·皆悉念佛念法念僧·舍利弗·  
汝勿謂此鳥·實是罪報所生·所以者何·彼佛國土·無  
三惡道·舍利弗·其佛國土·尚無惡道之名·何況有實  
。是諸衆鳥·皆是阿彌陀佛·欲令法音宣流·變化所作  
。舍利弗·彼佛國土·微風吹動諸寶行樹·及寶羅網·  
出微妙音·譬如百千種樂·同時俱作·聞是音者·自然  
皆生念佛念法念僧之心·舍利弗·其佛國土·成就如是  
功德莊嚴·舍利弗·於汝意云何·彼佛何故號阿彌陀·

舍利弗·彼佛光明無量·照十方國·無所障礙·是故號  
爲阿彌陀。又舍利弗·彼佛壽命·及其人民·無量無邊  
阿僧祇劫·故名阿彌陀。舍利弗·阿彌陀佛·成佛已來  
·於今十劫。又舍利弗·彼佛有無量無邊聲聞弟子·皆  
阿羅漢·非是算數之所能知。諸菩薩衆·亦復如是。舍  
利弗·彼佛國土·成就如是功德莊嚴。又舍利弗·極樂  
國土·衆生生者·皆是阿鞞跋致。其中多有一生補處·  
其數甚多·非是算數所能知之。但可以無量無邊阿僧祇  
說。舍利弗·衆生聞者·應當發願·願生彼國。所以者



何。得與如是諸上善人。俱會一處。舍利弗。不可以少善根福德因緣。得生彼國。舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖衆。現在其前。是人終時。心不顛倒。即得往生阿彌陀佛極樂國土。舍利弗。我見是利。故說此言。若有衆生。聞是說者。應當發願。生彼國土。舍利弗。如我今者。讚歎阿彌陀佛不可思議功德之利。東方亦有阿閼鞞佛。須彌相佛。大須彌佛。

須彌光佛。妙音佛。如是等恆河沙數諸佛。各於其國。  
出廣長舌相。徧覆三千大千世界。說誠實言。汝等衆生。  
當信是稱讚不可思議功德。一切諸佛所護念經。舍利  
弗。南方世界。有日月燈佛。名聞光佛。大燄肩佛。須  
彌燈佛。無量精進佛。如是等恆河沙數諸佛。各於其國。  
出廣長舌相。徧覆三千大千世界。說誠實言。汝等衆  
生。當信是稱讚不可思議功德。一切諸佛所護念經。舍  
利弗。西方世界。有無量壽佛。無量相佛。無量幢佛。  
大光佛。大明佛。寶相佛。淨光佛。如是等恆河沙數諸

佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。北方世界。有燄肩佛。最勝音佛。難沮佛。日生佛。網明佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。下方世界。有師子佛。名聞佛。名光佛。達摩佛。法幢佛。持法佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等

衆生。當信是稱讚不可思議功德。一切諸佛所護念經。  
舍利弗。上方世界。有梵音佛。宿王佛。香上佛。香光  
佛。大燄肩佛。雜色寶華嚴身佛。娑羅樹王佛。寶華德  
佛。見一切義佛。如須彌山佛。如是等恆河沙數諸佛。  
各於其國。出廣長舌相。徧覆三千大千世界。說誠實言  
。汝等衆生。當信是稱讚不可思議功德。一切諸佛所護  
念經。舍利弗。於汝意云何。何故名爲一切諸佛所護念  
經。舍利弗。若有善男子善女人。聞是經受持者。及聞  
諸佛名者。是諸善男子善女人。皆爲一切諸佛之所護念

· 皆得不退轉於阿耨多羅三藐三菩提。是故舍利弗。汝  
等皆當信受我語。及諸佛所說。舍利弗。若有人已發願  
· 今發願。當發願。欲生阿彌陀佛國者。是諸人等。皆  
得不退轉於阿耨多羅三藐三菩提。於彼國土。若已生。  
若今生。若當生。是故舍利弗。諸善男子善女人。若有  
信者。應當發願。生彼國土。舍利弗。如我今者。稱讚  
諸佛不可思議功德。彼諸佛等。亦稱讚我不可思議功德  
· 而作是言。釋迦牟尼佛。能爲甚難希有之事。能於娑  
婆國土。五濁惡世。劫濁。見濁。煩惱濁。衆生濁。命

濁中。得阿耨多羅三藐三菩提。爲諸衆生。說是一切世間難信之法。舍利弗。當知我於五濁惡世。行此難事。得阿耨多羅三藐三菩提。爲一切世間說此難信之法。是爲甚難。佛說此經已。舍利弗。及諸比丘。一切世間天人阿修羅等。聞佛所說。歡喜信受。作禮而去。

佛說阿彌陀經

拔一切業障根本得生淨土陀羅尼

南無阿彌多婆夜。哆他伽多夜。哆地夜他。阿彌利都婆  
毗。阿彌利哆。悉耽婆毗。阿彌唎哆。毗迦蘭帝。阿彌唎哆。  
毗迦蘭多。伽彌膩。伽伽那。枳多迦利。娑婆訶。

# 佛說阿彌陀經易解序

釋淨空

余昔講習華嚴法華楞嚴圓覺諸大乘經論三十餘年，始澈悟淨土法門爲一切諸佛，度衆生、了生死、出三界、圓成佛道之不二法門。深體大小二本，原是一切諸佛如來徹底悲智，究暢無極，稱性暢懷所宣演之無上至真第一經也。若準究竟方便求之，則唯獨佛說阿彌陀經耳。古人所謂中本小本華嚴者，誠有據也。是經也，言簡義周，即是華嚴，即是大藏之精要也，謂之諸佛如來心要，不爲過也。人人能持，個個能修，簡易、穩當、直捷、圓頓。七日成功，片言即證；十方諸佛異口同讚，以其易修難信也。信則即身往生，不退成佛。其功德利益，即使諸佛，亦無能稱說，誠不可思議也。於是深會蓮池蕩益諸祖真境，死盡偷心，老實念佛，一心專修專弘矣。余雖依疏演要解爲之廣讚，仍須歲月始得竟經，終未能以少時令初學即入此無比之佳境爲憾耳。佛子韓鍊，從學二十餘年，深得經旨祖意，有感於斯，發心述爲易解，專接初學，可謂同佛悲心矣！覽之，文詞簡潔，述解嚴正。既甚便於初機，誠有益於贊化；令讀者由淺入深，由近悟遠，由是而入諸祖大疏進而明悟



諸法實相。其於淨宗無上法門，自能生信，由信而願，使人心、願、解、行，一一如佛無異，求願往生必矣！佛子之上報四恩，下濟三苦，當如是耳。香江善友文忠袁居士，發心印送，是欲舉世人皆知修淨業，心淨則國土淨矣。大經曰：「佛所行處，國邑丘聚，靡不蒙化！天下和順。日月清明，風雨以時，災厲不起，國豐民安。兵戈無用，崇德興仁，務修禮讓；國無盜賊，無有怨枉，強不凌弱，各得其所。」是人果能於佛誠諦之言，深信切願，一心持名，自然身心清淨，現前必獲消災難、長善根、增定慧、滅罪業、延福壽、轉劫運之殊勝大利。功德回向普施法界有情，來日決定得生淨土。吾知其人，必也蓮邦勝友，助佛行化者也；其為利益，莫能名焉。

庚午中秋釋淨空敘於香江中華佛教圖書館